

## Chimbuko la Uzima



## SABATO MCHANA

**Somo la Juma Hili:** Yohana 1:4; Yohana 10:10; Yohana 1:12, 13; Yohana 6:61-68; Hesabu 13:23-33; Mt. 4:1-4.

**Fungu la Kukariri:** "Mimi ndimi njia, na kweli, na uzima; mtu haji kwa Baba, ila kwa njia ya mimi" (Yohana 14:6).

**K**atika Injili ya Yohana, Bwana Yesu alipoulizwa kama Yeye alikuwa nani, alijibu kwa neno linaloonesha uungu. "MIMI NIKO" ilikuwa rejea isiyo na makosa imhusuyo Bwana Mwenyewe, Aliyemtokea Musa kwenye kichaka. "MIMI NIKO AMBAYE NIKO," ndivyo alivyomwambia Musa (Kut. 3:14). Na Mungu huyu huyu, ambaye ndiye "MIMI NIKO," alifanyika "mwili, akakaa kwetu; nasi tukauona utukufu wake, utukufu kama wa Mwana pekee atokaye kwa Baba; amejaa neema na kweli" (Yohana 1:14).

Mada ya "MIMI NIKO" inatiririka kote katika Yohana. Fungu la kukariri la juma hili linaakisi mada hiyo: "Mimi ndimi njia, na kweli, na uzima" (Yohana 14:6). Huyu "MIMI NIKO" ni Nuru ya ulimwengu, Mkate wa Uzima, Lango au Mlango wa kondoo, Mchungaji Mwema na Mzabibu wa Kweli.

Juma hili linaendelea na udhihirisho wa Mungu kama tulivyopewa na Yohana. Kwa ukamilifu zaidi tutaangalia upande mwingine wa mambo, ambapo, licha ya ushahidi wenye nguvu kumhusu Yesu kama Masihi, baadhi walimkataa. Tutajifunza juu ya wazo hili kwa sababu mbili: kuepuka makosa yale yale, lakini pia kufikiria jinsi tunavyoweza kuwafikia wale walio hatarini kufanya kosa lile lile pia.

*\*Jifunze somo la juma hili unapojiandaa kwa ajili ya Sabato, Novemba 30.*

## Ndani Yake Ndimu Ulimokuwa Uzima

*Katika Yohana 1:1, mtume anasema kwa uwazi kwamba Yesu ni Mungu, Mwana wa kimbungu. Matokeo yake, katika Yohana 1:4 -"Ndani yake ndimo ulimokuwa uzima, nao ule uzima ulikuwa nuru ya watu" - rejea kwa ajili ya uzima hapa yapasa iwe ni uzima wa kiungu, hali ya kuwepo milele kwa nafsi isiyozaliwa. Kwa sababu Yeye anao uhai ndani Yake Mwenyewe, anaweza kuweka uhai Wake chini na kuutwaa tena (Yohana 10:17). Na, kwa sababu anao uhai ndani Yake, anaweza kumpatia uhai yeyote Anayemtaka (Yohana 5:21; linganisha na Yohana 14:19).*

Neno uzima (zoë) linaonekana mara 36 kwenye Injili ya Yohana, kama asilimia 25 ya matumizi hayo katika Agano Jipya. *Katika Yohana 1:4, 5, kando ya kuzungumzia Chanzo cha uzima katika sayari yetu, neno pia linaunganishwa na wokovu. Kote katika Yohana, wazo hili la uzima (zoë) mara nyingi zaidi linazungumziwa kama uzima wa milele, ahadi ya wokovu (Taz. Yohana 3:15, 16, 36; Yohana 4:14, 36; Yohana 6:27, 40, 47, 54, 68; na Yohana 10:27, 28). Hivyo, Yeye alitoa uhai kwenye Uumbaji Ndiye huyo huyo anayeleta wokovu, uzima wa milele, kwa ulimwengu uliopotea.*

**Kwa nini Yesu alikuja hapa duniani?** *Yohana 1:29; Yohana 3:16; Yohana 6:40; Yohana 10:10; Yohana 12:27.*

*"Na kama vile Musa alivyomwinua yule nyoka jangwani, vivyo hivyo Mwana wa Adamu hana budi kuinuliwa; ili kila mtu aaminiye awe na uzima wa milele katika yeye" (Yohana 3:14, 15).*

*Kama vile yule nyoka wa shaba alivyochukua nafasi ya Waisraeli waliokuwa wameumwa na nyoka, vivyo hivyo Yesu alichukua mahali petu, sisi ambao tumeangushwa na dhambi. Yeye alichukua adhabu iliyokuwa yetu ili tupate uzima uliokuwa Wake.*

*Ni shauku ya Kristo pia kwamba sisi tupate uzima na kuwa nao tele (Yohana 10:10). Hivyo, "bali wote waliompokea aliwapa uwezo wa kufanyika watoto wa Mungu, ndio wale waliaminio jina lake; waliozaliwa, si kwa damu, wala si kwa mapenzi ya mwili, wala si kwa mapenzi ya mtu, bali kwa Mungu" (Yohana 1:12, 13).*

*Kristo alikuja kumdhihirisha Baba kwetu. Kwani, "hakuna mtu aliyemwona Mungu wakati wo wote; Mungu Mwana pekee aliye katika kifua cha Baba, huyu ndiye aliyemfunua" (Yohana 1:18). Kwa kuona tabia ya Yesu, tunaweza kuona tabia ya Baba.*

**Tunaweza kujifunza nini kutokana na maisha ya Bwana Yesu kuhusu tabia ya Baba? Kwa nini udhihirisho huu ni habari njema kiasi hicho?**



## Maneno ya Uzima wa Milele

**Soma** Yohana 6:61-68. Wakati Bwana Yesu alipowauliza wanafunzi Wake kama nao wangemwacha, jibu la Petro lilikuwa la maana gani?

Maneno ya Petro kuhusu “uzima wa milele” yanagusa mada inayoonekana kote katika Injili ya Yohana. Mkusanyo wa virai kuhusu uzima wa milele unaonekana kwenye Yohana 6, katika muktadha wa kulisha watu 5,000 (Yohana 6:27, 40, 47, 54, 68). Bwana Yesu anasema kwamba Yeye ni Mkate wa Uzima (Yohana 6:35), akimaanisha kwamba maisha Yake, kifo Chake na ufufuo Wake ni chimbuko la uzima wa milele.

Kirai, uzima wa milele au kirai chenye kulingana na hicho kwa maana, kinaonekana kama mara 17 katika Injili ya Yohana. Msemu huu hauhusu kuwepo kwa roho, au kuwa sehemu ya nafsi ya milele, au kuwa katika dhana nyingine fulani ya kuwa katika nusu kaputi au katika anga. Badala yake, msemu huu unahusu nguvu ile inayotoa uhai inayoleta wokovu na maana kwa kuwepo kwetu sasa na kwa maisha yasiyo na ukomo Bwana wetu atakaporejea. Kama vile Bwana Yesu alivyoweza kuwa mwili, vivyo hivyo ufufuo ambao Yeye anauzungumzia unatokea katika muda na nafasi katika mwili wa kibinadamu. Huo ni ufufuo kutoka kwa wafu, kufanywa upya kwa maisha ambayo tuliwahi kuwa nayo katika Edeni.

**Je, tunapokeaje uzima wa milele? Yohana 3:15, 16; Yohana 5:24; Yohana 6:40, 47; Yohana 8:31; Yohana 12:46; Yohana 20:31.**

Kwa imani tu tunaamini kwamba Yesu Kristo alikuja kuishi na kufa kwa niaba yetu. Imani hii inatujia kama karama, lakini kwa kudhamiria sharti tuchague kujisalimisha sisi wenyewe kwa Yesu, kutubu na kudai damu Yake kwa ajili ya msamaha na utakaso wa dhambi.

Wakati Bwana Yesu alipomwuliza Petro ikiwa yeye pia, ataondoka, jibu la Petro, “Bwana! Twende kwa nani? Wewe unayo maneno ya uzima wa milele” (Yohana 6:68), hilo lilitoa ufupisho wa maana ya wokovu na jinsi ya kuupata. Hautokani na falsafa, historia au sayansi – masomo ya kibinadamu. Unatoka kwa Yesu, ambaye – ndani Yake Mwenyewe anao uzima wa milele – anautoa kwa uhuru kwa wote, ambao wanapomwitikia Roho Mtakatifu, wataukubali.

Ahadi ya kuwa na uzima wa milele inaathirije jinsi tunavyoyatazama maisha yetu ya hapa yasiyodumu? Inapasa iathirije namna tunavyoangalia?

## Kuamini na Kuzaliwa Upya

**Soma** Yohana 1:12, 13. Ni hatua gani zilizoelezewa hapa zinazohusu kuwa Mkristo?

Yohana aliandika Injili yake ili tuweze kumwamini Yesu na kwamba kwa kuamini tuweze kuwa na uzima wa milele katika jina Lake (Yohana 20:31). Katika Yohana 1:12, 13, mchakato huu umeelezwa katika hatua mbili. Kwanza, tunampokea Yeye, yaani, tunamwamini Yeye. Pili, Yeye anatupatia mamlaka au uwezo wa kuwa watoto wa Mungu, unaofafanuliwa katika mstari wa 13 kama aliyezaliwa na Mungu. Kwa hiyo, kuna kipengele cha kibinadamu na cha kiungu cha kuwa Mkristo. Ni lazima tutende kwa imani, tumpokee, na tuwe wazi kwa nuru, lakini yeye ndiye anayehuishia moyo.

Kwa kweli, imani yenyewe ni zawadi ya Mungu ambayo huja kwa kusikia Neno Lake (Rum. 10:17). "Ili kuwa na imani ya kweli, yenye kudumu katika Kristo, ni lazima tumjue Yeye jinsi Anavyowakilishwa katika neno." – Ellen G. White, *Fundamentals of Christian Education*, uk. 433. "Roho akitenda kazi juu yake na kutia nuru akili ya mwanadamu, hujenga imani katika Mungu." – Maoni ya Ellen G. White, *The Seventh-day Adventist Bible Commentary*, juz. 7, uk. 940.

Wale wanaomwamini au kumkubali Mwana kama Masihi wanapokea uzima wa milele. Yohana pia anasisitiza kukubali au kuamini Neno hilo ambalo Yesu alilisema (Yohana 5:24, 38, 47). Ni kazi ya Roho Mtakatifu kuleta usadikisho (Yn. 16:7, 8; linganisha na Rum. 8:16).

**Soma** Warumi 8:16. Ni kanuni gani kuhusu wokovu katika Yesu inayoonekana hapa?

Imani, imani ya kibiblia, yenye msingi wake katika kazi ya Roho Mtakatifu mioyoni mwetu, ndiyo msingi wa imani yetu. "Imani ni.... baraka iliyo kuu – jicho linaloona, sikio linalosikia." – Ellen G. White, *In Heavenly Places*, uk. 104. Mtazamo wa kibinadamu kwa suala la imani unasema kwamba ni lazima tupate msingi kwanza, vigezo vinavyohibitisha uwepo wa imani, ndipo tuamini. Kinyume chake, mtazamo wa kibiblia unasema kwamba imani ni msingi, karama itokayo kwa Mungu (Efe. 2:8, 1 Kor. 1:17 – 24; 1 Kor. 2:1-6). Tunaanza na msingi wa imani, kisha kuanzia hapo tunakua katika ufahamu na neema.

Ikiwa mtu atakuuliza kuwa imani yako msingi wake upo katika nini, utajibuje? \_\_\_\_\_



## Kukataa Chimbuko la Uzima

Baadhi ya taarifa zinazosikitisha sana katika Maandiko yote zinatokea kwenye Injili ya Yohana. "Nayo nuru yang'aa gizani, wala giza halikuiweza.... (Nuru) Alikuwako ulimwenguni, hata kwa yeye ulimwengu ulipata kuwako, wala ulimwengu haukumtambua. Alikuwa kwake, wala walio wake hawakumpokea" (Yohana 1:5, 10, 11). "MIMINIKO" alikataliwa na wengi wa watu Wake Mwenyewe.

Haishangazi kwamba baadaye Paulo anaonya, "Basi msiutupe ujasiri wenu" (Ebr. 10:35). Kama ambavyo tumeona tena na tena, Kristo alikataliwa kwa sababu watu hawakulikubali Neno Lake.

"Namna ya kisasa ya kibinadamu ya fikra huwa inaanza na mashaka. Watu huwa wanahoji kila kitu ili wapate kujua kwamba kweli ni nini. Kile kinachostahimili moto wa udadisi wa hali ya juu ndicho wanachokikubali kama ujuzi wenye msingi imara, ambacho mtu anaweza kujenga imani yake kwacho. Baadhi yao wanatumia njia hiyo hiyo kwa Biblia, wakihoji kila kitu kutokana na mtazamo wa kisayansi, kihistoria, kisaikolojia, kifalsafa, kiakiolojia, au kijiolojia ili wapate kujua kwamba kweli ni nini katika Biblia. Mbinu hiyo yenyewe inaanza na kujenga katika kutilia mashaka ukweli wa Maandiko. Kristo alihoji, 'Atakapokuja Mwana wa Adamu, je! Ataiona imani duniani?' (Luka 18:8)." - E. Edward Zinke na Roland Hegstad, *The Certainty of the Second Coming* (Hagerstown, MD: Review and Herald Publishing Association, 2000), uk. 96.

**Soma Hesabu 13:23-33. Ni kitu gani kilichofanya tofauti kati ya taarifa mbili wapelelezi walizoleta kuhusu Kanaani?**

Dhambi ya Waebrania walipokuwa pale Kadesh-barnea ilikuwa kutilia mashaka Neno la Mungu. Mungu alikuwa amewaelekeza wakwee na kuitwaa nchi. Wapelelezi kumi na wawili walitumwa Kanaani ili kuipieleleza nchi. Walirejea na taarifa mbili. Walio wengi walitoa taarifa hasi. Kuna majitu kwenye nchi, miji iliyozungushiwa kuta, silaha ambazo hatujapata kuziona, na majeshi yaliyofunzwa vizuri. Tofauti na sisi, tumekuwa watumwa kwenye nchi ya Misri na hivyo tuna uzoefu mdogo tu wa kijeshi. Wapelelezi kumi walipiga kura ya 'Hapana,' wakisimamia ushahidi mzito uliotokana na mtazamo wa kibinadamu. Wapelelezi wawili walipiga kura ya 'Ndiyo' wakisimamia katika imani yao katika uwezo usio wa kawaida wa Neno la Mungu.

**Tunawezaje kuepuka kufanya kosa la namna hiyo hiyo lililofanywa hapa? Wakati huo huo, tunawezaje kuepuka ujuvi, yaani kufanya jambo fulani kipumbavu lakini tukiamini kwamba tunafanya mapenzi ya Mungu na kwamba hatutashindwa?**

## Hukumu

"Amwaminiye yeye hahukumiwi; asiyeamini amekwisha kuhukumiwa; kwa sababu hakuliamini jina la Mwana pekee wa Mungu. ...Kila mtu atendaye mabaya huichukia nuru, wala haji kwenye nuru, matendo yake yasije yakakemewa. Bali yeye aitendaye kweli huja kwenye nuru, ili matendo yake yaonekane wazi ya kuwa yametendwa katika Mungu" (Yohana 3:18 - 21; *linganisha na Yohana 1:10*).

**Kwa** nini watu huijia hukumu? Yohana 3:18, 36; Yohana 5:24, 38; Yohana 8:24; Yohana 12:47.

---

Kumkataa Yesu Kristo, Nuru ya ulimwengu, kunatuacha katika hali ya mashaka na majaribu kutoka kwa mwovu. Ni kuipa nuru mgongo na kuligeukia giza.

Hawa alipewa nuru ya namna ya kuhusiana na mti uliokuwa katikati ya bustani ya Edeni. Shetani alimjaribu kwa kumfanya atilie shaka nuru. Alilitia katika jaribu neno la Mungu kwa kuwaza kwamba Mungu wa upendo asingeharibu viumbe alivyoviumba. Aliendelea pia kutegemea data za ufahamu wake. Nyoka amekula matunda ya ule mti na sasa anao uwezo wa kuzungumza. Pengine nyoka yule alikuwa sahihi. Nikila tunda la mti huo, ninaweza kuwa kama Mungu! Akiwa amedanganywa, aliiacha nuru. Na mumewe naye akachagua njia ile ile.

**Soma** Mathayo 4:1-4. Ni kanuni gani alizozitumia Kristo katika jangwa la majaribu kukabiliana na udanganyifu wa Shetani?

---

Katika uwezo Wake, Kristo alikuwa na zana ya kibinadamu ya wazo lililotumiwa na Adamu na Hawa, watu walioishi kabla ya gharika na Israeli pale Kadesh-barnea. Angeweza kuhoji kwa nini Mungu wa upendo amwache Mwana Wake jangwani kwa siku 40 mchana na usiku bila chakula wala ulinzi. Angeweza pia kukusudia kuthibitisha u - Mwana Wake kwa kugeuza mawe kuwa mkate! Badala yake, alijibu kwa Neno la Mungu. Alitenda katika kiwango cha mambo ya kimbangu badala ya mfumo wa kidunia wa mawazo. Ilikuwa rahisi kiasi gani Kwake kutumia mantiki ya kujenga nia yake ya kufanya uamuzi usio sahihi, jambo ambalo watu wengi sana, hata wenye imani hufanya.



**Jifunze Zaidi:** Soma Ellen G. White, "Mungu Pamoja Nasi," uk. 7 - 15; "Pambano," uk. 208 - 216, katika *Tumaini la Vizazi Vyote*.

"Kwa kujishusha kuvaa ubinadamu, Kristo alifunua tabia ambayo ni kinyume na tabia ya Shetani. Bali alijishusha sana hadi kufedheheshwa. "Tena alipoonekana ana umbo kama mwanadamu, alijinyenyekeza, akawa mtii hata mauti, naam, mauti ya msalaba." Wafilipi 2:8. Kama ambavyo kuhani mkuu aliweka kando vazi lake zuri la kupendeza na kuvaa vazi jeupe la kuhani wa kawaida, ndivyo Kristo alichukua mfano wa mtumwa na akatoa dhabihu, Yeye mwenyewe kuhani, Yeye mwenyewe sadaka. "Bali alijeruhiwa kwa makosa yetu, Alichubuliwa kwa maovu yetu: adhabu ya amani yetu ilikuwa juu yake." Isaya 53:5.

"Kristo alitendewa stahili yetu, ili tuweze kutendewa kama anavyostahili. Alihukumiwa kwa ajili ya dhambi zetu, ambazo hakuzitenda, ili tuweze kuhesabiwa haki kwa haki Yake, ambayo haikuwa haki yetu. Alikufa kifo ambacho kilikuwa stahili yetu, ili tuweze kupata uzima ambao ulikuwa ni Wake. "Kwa kupigwa Kwake sisi tumepona" *Tumaini la Vizazi Vyote*, uk. 25.

## Maswali ya Majadiliano:

1. Bwana Yesu alitoa kikubwa hivyo ili kuiokoa dunia. Ni njia zipi unazofikiria kuwa ndizo njia bora zaidi za kusaidia wengine ili wapate kuiona kweli hii ya ajabu na kumjia Yeye kwa imani?

2. Ni tofauti zipi kuu katika kufanya maamuzi katika viwango vya kibinadamu kukilinganishwa na kufanya maamuzi kwa msingi wa udhihirisho wa kimbingu?

3. Mambo kama ya mantiki na urazini yanapelekanaje na uelewa wa Neno la Mungu? Tuna sababu gani za kimantiki za kuijia imani? Mambo kama utimilifu wa unabii au uzuri wa kushangaza na utata wa ulimwengu uliombwa vinatuelekezaje kimantiki kwa kuwepo kwa Mungu na ukweli wa mpango wa wokovu?

4. Mkiwa kwenye darasa, zungumzia jibu lako kwa ajili ya swali la mwisho somo la Jumanne. Imani yako imejengwa juu ya nini? Kama mtu angekuuliza kwa nini unamwamini Yesu na madai ya injili, ungejibuje?